



Aqqalu C. Jerimiassen

UPA 2023/101

Atassut

9. maj 2023

Nunatsinni allaffissornerup nunatsinnut tulluartumik nutaamik aqqissuuteqqinnissaanut Naalakkersuisut periusissiamik suliaqaqqullugit peqquneqarnissaanik Inatsisartut aalajangiiffigisassaattut siunnersuut. Periusissiaq kingusinnerpaamik UPA2024-mi saqqummiunneqassaaq.

(Inatsisartunut ilaasortaq Doris J. Jensen, Siumut)

Siunnersuut qissimiinnarlugu siunertaq pitsaasutut taperserusunnartutullu isikkoqarpoq. Ataguli eqqarsaqqilaarluta takorluulaartigu.

Tupinnangilaq nunatsinni politikikkut anguniagaqartarnitsinni ingerlariaqqinnissamut inorsartaratta, siunertaq kusanartoq ugartortuaratsigu, nalullugulu qanorpiaq tassunga pissanerluta. Una siunnersuut aamma taamaappoq.

Siunnersuuteqartummi tunngavilersuutimini taasaqanngilaq qanoq allaffissornerup issinnaaneranik siunnersuuteqarluni. Quppernerilli marluk atorneqarput pisimasut nunasiaataasimanerlu eqqartorlugit.

Aana apeqquut siulleq. Qanoq takorluugaqarpisi tulluarsarsinnaasoq? Uagut Atassummiit ersarissumik siunnersuutigissavarput: Nammineerluta sunniuteqarusukkutta, akisussaaqataarusukkutta qaffasissumik ilinniagaqarta. Meeqqagut oqaluttuuttuartigit, kaammattorlugillu qaffasissumik ilinniagaqarnissaannut.

Tusartuarterparpummi angajoqqaat meeqqatik oqaluukkaat kalaaliugaminngooq oqaatsinik allanik ilinniartariaqanngitsut. Immitsinnut killilersorluta siuariarnissaq takorloorsimanerparput? Immaqaluunniit allat killilersorlugit? Immitsinnut napatissinnaajumagutta akisussaaffik uatsinniippoq. Immitsinnut piumaffiginerusariaqarpugut.

Aappillaarissumimmi nunarput aqunneqartuarsimatillugu akisussaaffik allanut miloriunneqartuarpoq. Aappillaarissumik ingerlatilluta pisortat iliuseqarnissaannik naatsorsuuteqartuassaagut. Aappillaarissumillu ingerlajuartilluta nammineerluta iliuseqarnata utaqqiinnavissaagut. Eqeertariaqalerpugut massilluta ilinniagaqarniarta atorfiillu taakku nammineq tiguarlugit. Allammi pisuutiinnarlugit pikkorinnerulernaviangilagut.

Iliuserisinnaasarpullu alla tassaavoq akileraarutip apparneqarnera. Akileraarut taamak qaffasitsigisillugu qaffasissumik ilinniagaqarnissaq orniginarpiarneq ajorpoq. Uagullu politikkerit inatsisitigut innuttaasunik killilersuinerujussuarput unitsittariaqarparput kiffaanngissusiaasunik. Nammineerlutaluunniimmi aalajangersinnaanngilarput qanoq qaqugulu utoqqalinersiaqalernissatsinnut katersissalluta. Innuttaasut nammineersinnaanerat tatiginerulertariaqarparput.

Allaffissaarsuarput nammineerluta pilersitaraarput, nammineerluta siunertanut kusanartorsuarput piviusorsiuungitsunut nukippassuit aningaasarpassuit atorpagut. Nammineerluta toqqagarivarput aappillarilluartilluta qitiusumiit aqutsiniartuarneq. Kommunistiorpalaartumik aqutsinerup qitiusumiillu aqutsiniarnerujussuup allaffissornissaarsuaq pilersitaraa, allaallu avataaniit sulisorparujorujussuarnik aallertariaqarluta. Sulilu mamiasuutigaarput qallunaatut oqaluttut amerlammata.

Namminersortortagut allaffissaarsuatsinniit itigartittuarpagut takornialererusullutik qinnuteqartuaraluartut. Inuussutissalerinermut oqartussaaffik akisussaaffigilertariaqarparput inuussutissarsiornikkut siuarsaassagutta, avataaniit aningaasanik isaatitsiffissatsiarsuaq.

Kusanartuinnarmimmi angusaqarniaraluartarnerup kingunerivaa miliuunerpassuarnik asuli pinnguarneq. Ila pikkorluppallaarpugut.

Qitiusumik aqutsiniarpallaarunnaarluta siammarterisariaqarpugut, assersuutigalugu akileraartarnikkut sumiiffinnut tunnganerusut kommunitut utertillugit, sumiiffinni sullinneqarnerunissaq qulakkeerlugu, kiisalu akileraarutit sumiiffinnut atuuttussanngortillugit.

Pisimasut unittoorfiginagit, siunissaq kusanartorsuaq neriuuteqarfigiinnarnagu ullumikkut aaqqissinnaasagut aaqqitsigik. Pisimasut siunissarlu taamaallaat isiginiarutsigit inuiaqatigiinni kamassaq alliaruinnavissaq. Illummi pujoorfissua sanaqqaarniarparput, illup toqqavissaa qajannaatsoq suliareqqaarnagu.

Qaqugumorsuaq kingumut qiviarniaruarsinnaavugut anniaatigalugillu, ilinniarfissatsiarsuit. Sulili anniaatigut aallaaviginiartuarsinnarpagut immitsinnut nalligaluta. Aaqqiissutissallu tamatigut ataatsimoorussassaannartut isigiuartillugit innuttaasut ataasiakkaat utaqqiinnalertussaapput. Innuttaasut kiffaanngissuseqartutut misiginerulersitsigit, akisussaassuseqarnerulernerlu aamma misigissavaat. Pingaartumillu ilinniagaqarnikkut nammineerlutillu atukkaminut.

Takusinnaavarpummi inuit politikkerinik naatsorsuuteqartuaraluarlutik pakatsiuarut kamassaqartullu. Misigipput qulaatiinnarlugit politikkerit sulisut. Oqallorissorsuugaannimi neriorsuuteqarlunilu imaanngilaq nalunngikkipput qanoq anguniagaq anguneqassasoq.

Allaammi politikkerit ullumikkut inuit kamassaqarnerannik annertusaaqataasut, pisimasut uteqattaartuarlugit inuit kamassaannik atorluaapput. Politikkerit sulineq innuttaasunut tunissuteqarniaannarnermut tunngajunnaarallarli, politikkeritullu innuttaasut kiffaanngissuseqarnerunissaannik aporfilersuutaasunillu annikillisaanermik eqqarsarnerusa.

Sulinitinni inuk qitiujuarli, tamatigut. Qaqugumorsuaq nuna nammineertoq
eqqartortuarsinnaagaluarparput, nunali innuttaasoqanngippat pinngortitaannaavoq kusanartoq.
Allaffissornikkut aaqqissueqinniarneq imminik ajunngilluinnarpoq, aamma peqataassaqaarpugut.
Suliassavittaali illup toqqavianiippoq, pujoorfianiinnani.

Massakkullu suli nalunarmat siunnersuuteqartoq qanorpiaq allaffissornikkut takorluinersoq,
taamaattorli Atassummiit aaqqiissutaasinnaasunik uani siunnersuuteqarpugut.
Utaqqimaarallassaagut ataatsimiititaliamullu innersuussiinnarallarluta.